

Regional News Unit AIR Aizawl  
Saturday, July 13, 2024

Time - 7:30 -7:40Hrs

## REGIONAL NEWS BULLETIN

### HEADLINES (MORNING)

- Agriculture Department chuan a ni thum nan sorkarin buhfai lei a tum chungchang Kolasib Dist Leilet neitute an sawipui.
- Agriculture and Farmers Welfare Department Minister Pu PC Vanlalruatan Vaphaiah Block Agriculture Office leh Animal Feed Processing Plant a hawng.
- Prime Minister Narendra Modia chuan BIMSTEC chu eibar zawinna leh khawtlang nun hmasawn tirtu khawlpui ber a ni a ti.
- Nepal Prime Minister Pushpa Kamal Dahal 'Prachanda' chuan nimin khan Parliament ah sawrkar bukna a paltlang zo lo.



### KOLASIB SURVEY

Mizoram sorkar hnuai Agriculture Department hotute chuan a ni thum nan nimin khan Kolasib District Agriculture Office Conference Hall-ah 'Survey and Awareness Campaign on Paddy Procurement within Kolasib District' tih thupui hmangin Leilet neitute nen inkawmhona an buatsaih a, he hun hi Pu George Lalthangura, Agri Jt Director in a hmanpui.

Kolasib DAO Pu Joseph Lalnuntluanga kaihhruai ah hian thusawiin, Agriculture Jt Director Pu George Lalthangura chuan, Mizoram sorkar in Leilet leh tlangrama Buh thar chhuah te lei a tum thu a sawi a, chumi atana hmalakna hmasa ah chuan Kolasib leh Mamit District chhunga Leilet neitute hnenah sorkar hmalakna hrilhhriatna kalpui anih thu sawiin, sorkar hmalakna a hlawhtlin theih nan Leilet neitute chu theihtawp chhuah a, kum dang aia Buh thar tam tuma hmala tur in a sawm a. Sorkar in Buh hum a leina rate tur chu karleh ah thuneitu sang ten an bithliah dawn ni a saw in, Buh hum te chu a hralh duh ten tih luihna telloin a lei khawmna hmun tur 'Procurement Centre' ah rate tha takin an hralh anga, Buh hum leitu tur chu FCS&CA department niin, chung Buh leikhawm te chu Rice Mill ah her anih tur thu Agriculture Jt Director chuan a sawi.

Pu R. Vanlalchhuanga, Agriculture Dy Director chuan, Mizorama Buh thar chhuah te chu helai aia to in State pawn lamah an lei ngam thu a sawi a, State pawn lam mite aia rate tha zawkin sorkar chuan a lei ngam a rin thu leh kuminah Buh lei tur tam lo mahse a rate a that phawt chuan kum thar lamah chuan lei tur a pun ngei a rin thu a sawi.

Agriculture department EE Pu Lalchhanliana chuan, sorkar ruahmanna a hlawhtlin a, Buh leikhawm tur a awm chuan Pangbalkawn a Rice Mill-ah Buh her tir anih tur thu sawiin, heng laiah Buh kan leikhawm thei anih chuan phai lama Buh thar tam tak hralh chhuah thin chu a kiam ngei a beisei thu a sawi a. Pangbalkawn-a Rice Mill din nan Congress sorkar laiin NEDP sum atangin cheng nuai 80 zet tanpuina pek anih thu a sawi bawk.

He hun kaihruaitu Pu Joseph Lalnuntluanga, Kolasib DAO chuan, MIRSAC in khawl changkang hmangin Kolasib District chhunga Leilet a siam theih ram an enfiahna ah Hacter 1197 a zau a awm thu tarlang in, kan zawl neih te tangkai taka hmang turin tih tur hmabak tam tak ala awm thu a sawi a, Leilet neitute chu an zawl neih te tangkai taka hman anih theih nan tha thlah lo turin a chah a ni.

<><><>

HEALTH MINISTER

Social Welfare Minister Pi Lalrinpuii chuan Lawngtlai-a Lairam Rescue Centre Main Building nimin khan a hawng a.

Pi Lalrinpuii chuan Lairam Rescue Centre Main Building chu ruihhlo ngai, a duh leh mamawh apiangten rilru leh taksa lama siamtharna an chan theih nan leh tangkai taka an hman theihna turin lawm takin a hawng tih a sawi a. Sawrkarin ruihhlo do a ngaipawimawh em em a, mimal leh pawl ruihhlo do thinte chu sawrkarin a thlawp tlat a ni, a ti. Ruihhlo do turin sawrkarin State leh District level-ah commitee hrang hrangte a din a, chutih rualin sawrkar tan do hneh a harsaa, NGO leh Kohhran te thawhpuina a tul tak zet a; thawhhona tha tak i nei zel ang u tiin a sawm a ni. Mizoramah ruihhlo bawiha tang tam tak awmin nunna hlutak chan a ni fo chu a run thlak hle tih sawiin Pi Lalrinpuii chuan mipuite thangharh a hun tawh tak zet a ni, a ti.

Social Welfare Minister chuan ruihhlo do kawngah inzirtirna mumal leh uar zawka kalpui a tul hle a ti a. Kohhran ten program an neihna hrang hrangah ruihhlo ti lo tura inzirtirna uar zawka kalpui turin a ngen a ni.

Ruihhlo laka fihlim turin Chhungkua a pawimawh ber nia a hriat thu sawiin Pi Lalrinpuii chuan chhungkuaah bul tan thar leh ni se a ti a, In chhungkhurah nu chauhin hma a la thei lo a, pa ber nen tan tlan a ngai a, chhungkaw tinah nu leh paten tha thawh thar leh se a ti.

Minister chuan, Social Welfare Department leh Ruihhlo ngai enkawlna In te thawhho a tul hle tih tarlangin, Lairam Rescue Centre chu thawhpuiah a sawm a. Mizorama ruihhlo ngai enkawlna hmun atangin mi thahnem tak enkawl dam niin, mi tha tak takah chherchhuah an ni fo tih sawiin Minister chuan Lairam Rescue Centre pawhin taksa leh rilru damna nen mi tam tak an enkawl chhuah a beisei tlat tih sawiin hmalam hunah duhsakna a hlan nghal a ni.

Health Minister ni bawk Pi Lalrinpuii hian nimin zing khan Lawngtlai khawpui chhunga Damdawiin Pathum - District Hospital, Lairam Christian Medical Centre leh Christian Hospital Lawngtlai te a tlawh a. Pi Lalrinpuii chuan Damdawiina thawkte chu hna ropui tak thawk, mipuite inngahna an nihna hre reng tur leh chumi rilrupua thahnemngai taka thawk turin a chah a. Mizoram Health Care System chu thapui thawha siamthat a ngai tak meuh tih sawiin, sawrkarin theihtawp a chhuah mek a ti.

<><><>

## AGRI MINISTER

Agriculture and Farmers Welfare Department Minister Pu PC Vanlalruata chuan Vaphaiah Block Agriculture Office leh Animal Feed Processing Plant te nimin khan a hawng a. Vaphai Primary Agriculture Credit Society pisa a tlawh bawk.

Block Agriculture Office (BAO) leh Animal Feed Processing Plant hawanna inkhawm Vaphai Community Hall-a neihah Pu Vanlalruata chuan Vaphai leh a chhehvel khuaa kuthnathawktu ten tangkai tak a an hman theih nan duhsakna a hlan a.

Sawrkar tharin kuthnathawktute chawikan a ngaipawimawh ber a, he mi tihlawhtling tur hian sawrkar kalphung (policy) pawh an duang tih a sawi a. Kuthnathawktu ten awlsam zawka thlai thar an hralh theih nan thlai chi li - sawhthing, aieng, hmunphiah leh hmarcha te rate mumal tak sawrkarin a bithliah tawh a, thlai dang pawh tih chhoh zel tum niin Chief Minister kaihhraina hnuaiyah buh hum lei dan tur ngaihtuah mek a ni, a ti bawk. Pu PC Vanlalruata chuan thlai rate mumal tak bakah kuthnathawktute tan Crop Insurance pawh tih chhoh tum a ni tih a tarlang a. Sawrkarin kuthnathawktute hma khua a tan sum leh pai hman a tum a, mipuite chu sawrkar atanga hamthatna dawngtu ‘beneficiary’ mai ni lova sawrkar thawhpuitu ‘partner’ ah an ngai tih sawiin hmasawna rahbi nghet leh tluantling zawh puiah a sawm a ni.

Cooperation Minister ni bawk Pu PC Vanlalruata chuan Primary Agriculture Credit Society (PACS) te chu sawrkarin Bank-te tih theih ang zawng zawng ti ve thei turin a thum tih sawiin, mipui ten tangkai leh zual zawka an hman theih a tul a ni, a ti. PACS chu mipuite rawngbawlina pawimawh tak a nih angin hruaitute chu mipuite tana inhnukhniam turin a ngen a, thawhhona boruak tha tak siam zel turin a chah bawk a ni.

Khawbung Block Agriculture Office, Vaphai hi Border Area Development Project 2013-2014 sum cheng nuai 10 hmanga sak a ni a. Kum 1979 atanga ding tawh Agriculture Department Circle Office chu March ni 9, 2021 khan Block Agriculture Office ah hlan kai niin, Khawbung RD Block hnuaiyah khua te a huam a ni.

Animal Feed Processing Plant hi Vaphai Primary Agriculture Credit Society te din a ni a. Warehouse, pisa, kudam, Transformer leh a panna kawng laih nan cheng nuai 47 sen a ni a. Thlai herna khawl leh hriak herna khawl hi sawrkar laipui scheme Pradhan Mantri Janjatiya Vikas Mission hnuaiyah Van Dhan Vikas Kendra kalflangin Cooperation Department ten an bun sak a ni.

<><><>

## CRIMINAL LAWS

Ramchhunga dan thar 3 Criminal Law chu July ni 1 atangin hman tan ni mahse a tuk July ni 2 ah dan thar hmang lo turin Supreme Court ah Public Interest Litigation (PIL) thehluh a ni.

He thu hi Govt Mizoram Law College Asst Professor Pi Zoparliani’n Akashvani corr nen an inkawmna ah sawiin Supreme Court a PIL lut chu dan thar hi a tha tawklo an tih vanga lut ani a ti a, dan thar chu hman ngei tur ani tih sawi chian theih ala ni lo tih sawiin Case kal lai mek a ni a ti a, dan tharah chuan dan hluia mi zaa 80 ala awm tho a ni a ti.

Dan hluiah thuthar thehdarhtuten sawrkar duhloh zawnga an sawi avanga hrem theihna dan Section 124A awm thin chu a hma aia na zawkin hrem theiha siam a ni a ti a, thuziah mai piah lamah zalenna tam tak lo awm thin chu dan hmangin hrem theih ani tawh dawn tih a sawi.

Advocate Emanuel Lalthazuala pawhin dan thar chungchang sawiin hmun hrang hrangah thlawp lo tu tam tak an awm a ti a, dan thara an sawiselna lian tak zingah Police ten misual an kawl theih hun chung tih rei ani a ti a, mimal dikna chanvo a bawhchhia tia sawichhuak an tam tih a sawi bawk.

Advocate sawi danin Dan chuan mipuite dikna ngaihtuah chung a ro rel thin a ni a ti a, sawiselna tam tak karah sawrkarin a rawn chhawp chhuah avangin rorelna in kal danah rinna nghah ngam a pawimawh tih a ti a, Mipuiin ngaihven a pawimawh tih sawiin engkimah mahni himna tur dan ngaihven a pawimawh tih a sawi.



## PM ON BIMSTEC

Prime Minister Narendra Modia chuan BIMSTEC chu eibar zawnga leh khawtlang nun hmasawn tirtu khawlpui ber a ni a ti. Nimina BIMSTEC Foreign Minister ten New Delhi-a an kawmnaah he thu hi sawiin Pu Modia chuan India chuan BIMSTEC chhehvelah remna, hausakna leh himna thlen turin theihtawp a chhuah a ti.

Prime Minister chuan inbiakpawhna, energy, sumdawna, agriculture, science, security leh mipuite inpawhna turin inbiakna tha tak an neih thu a sawi a. India policy "Neighbourhood First" leh "Look east Policy" ah leh SAGAR vision ah BIMSTEC chu a pawimawh zia a sawilang.

Hei bakah hian Prime Minister Modia chuan Thailandchu BIMSTEC Summit kumin September thlaa neih turah a thlawp tih a sawi bawk.



## NEPAL

Nepal Prime Minister Pushpa Kamal Dahal 'Prachanda' chuan niman khan Parliament ah sawrkar bukna a paltlang zo lo. Prachanda hian sawrkar rintawkna paltlang turin vote a hmu zo lo a. Communist Party of Nepal (Unified Marxist Leninist) chuan sawrkar an thlawpna an hnukdawk a. Nepal Parliament-a House of Representatives ah member 194 chuan sawrkar duhlo lamah vote an thlak a, sawrkar thlawp zawngin member 63 in vote an thlak a. Sawrkarna siam turin vote 138 hmuh ngai chu a hmu tling ta lo a ni.

